

Efasis

A Lagasai Si Pol Xe Sina Mu Efasis

A Ferawaian Paamua

A fufuna lamonan ina lagasai aanabe' a malaan: a Piran rao i timin faxuvul a maana mo xapiak lapaa Krai, a maana mo xapiak la xunavata e ti la xavala e na Krai i taa putuna maana mo xapiak. (1:10) E a Piran a vubuk fatamasiak a mu rabuna sina xa talo ri taa tiginina fatateak tuuna xuvul pa Krai e ri taa waan lapaana lamonan saxa.

La nobina mata ina lagasai na Pol a ferawai faaxaves pana mamaaluxan sina Piran e a faxuvul a maana rabuna aava ri namkai se Krai malaan sena pabung saxa mon. Pana faisok si Yesus, a Piran a siak fa'uli a rabuna xe sina e a tavai nari pana Vovau Xaradak malaan sena fakalimaan o nane i taa vil a maana mo roxo xe siri malaan se' nane fo kuus fanai pana. (1:14) La fataraguaiana nobina ina lagasai na Pol a kuus o a mu 'Kristian' ri faxuvul xuvul pa Krai e voxo ri taagul faroxo tuuna e ri usi a vilaana sina Piran fatak.

Lana lagasai aanabe' na Pol fo vil a xasano ferawaian paap xena faxalit famatavas a rabuna o ri taa faxuvul xuvul pa Krai xena savat pabung saxa. Nane a kuus o a mu rabuna sina Piran ri malaan sena vipin saxa e na Krai a malaan sena putuna vipin aave. (4:1-16) E vaxa mu rabuna sina Piran ri malaan sena lifu e na Krai a xaaxaak mata ina lifu. (2:19-22) E fulaa a mu

rabuna sina Piran ri malaan sena saxa tefin e na Krai a malaan sena lavana tefin aave. (5:22-32) A lagasai aanabe' taxa xuus fatexaas netaara pana maana mo roxo aava Piran rao i taa vile xana mu rabuna sina.

¹ Nenia na Pol: a Piran fo burau xena savat yaamut si Krai Yesu e naboxo ne taxa kala xe simi mu rabuna fatak pe Efasis aava mi taxa tigina fatateak lana namkaian se Krai Yesu.

² Ne nung a Piran Tamataara e Memai Yesu Krai o re taa tavai nami pana xakaavangan xatam e a luaian.

A Piran A Tavai Nari Aava Ri Namkai Se Krai Pana Maana Roxoyan La Xunavata

³ Taara taa kuus faatulan a Piran aava Piran e na Tama Memai Yesu Krai sitaara. Nane fo tatavai xe sitaara aava taara waan la xuvulaian xuvul pa Krai, pana maana roxoyan molava piis aava waan la xunavata. ⁴ Senaso paamuina yaan a Piran a vil fanei a maana mo xapiak, nane fo siak fati xo netaara xena tigina faxaradak pana piau ta lalosaat la matana sena xuvulaian sitaara xuvul pa Krai. ⁵ E senaso nane vubuxan xasingit netaara, a Piran xa a lamon faati o i taa xavei netaara e fa'isin netaara pana rafulak sina senaso taara namkai se Yesu Krai. E nane xavang netaara malaan senaso nane nanam pana vil malaane. ⁶ E layaan nane vil malaane, a faxalit famatavas a xakaavangan xatam sina e a xakaavangan xatam aave a tavaie pana isin lava paaliu. Aang, nane fo tavai faxavesan netaara aava taara waan la xuvulaian xuvul pa Natuna, pana xakaavangan xatam aave. ⁷ E sena ria i

Natuna aava nane vubuxan xasingite, a Piran a maraan fa'uli netaara. Aang, nane lamon tapin a mu vilaana saat sitaara senaso a xakaavangan xatam sina a pelalava ⁸ e vaxa a tiuan fasoliu a xakaavangan xatam aave xuvul pana texaasan e masaman xapiak xulutaara. ⁹ A Piran lana vubuxanan roxo sina, fo faxalit famatavas netaara pana maana mo fufunai aava nane buk vil famatavase se Kraais ¹⁰ lana yaan fatak ina: nane lamon faati o i taa lisan faxuvul a maana mo ti la xunavata e la xavala lapaana tateaxan ina saxa paamua, na Kraais.

¹¹ E sena xuvulaian simaam xuvul pa Kraais, a Piran aava vesan fatak a maana mo xapiak malaan sena vubuxanan sina, fo siak fati xo nemaam xena savat rabuna sina. ¹² Nane vil malaane talo nemaam aava maam lamon fanai se Kraais paamua, maam taa tavaie pana isin roxo paaliu. ¹³ E layaan mi langai a lagasai ina tuunayan aava Lagasai Roxo ina fakaxupaan nami, e mi namkai sena, a Piran a fakalimaan nami vaxa pana Vovau Xaradak sina aava nane fo kuus fanai pana. ¹⁴ E a Vovau Xaradak xo aava waan la xunus itaara, a malaan sena faati votaian ina maana mo aava Piran fo kuus fanai pana xe sitaara, fefexaxaas a yaan a Piran i taa maraan fa'uli netaara aava taara mu rabuna sina. Taara taa faatulan vulan a isin molava paaliu marasaxa sina!

A Fenungan Si Pol

¹⁵ A Piran fo vil a maana mo aanabe' e voxo ti la yaan layaan ne langai pana namkaian simi se Memai Yesus e pana vubuxan xasingitan simi

xe siri aava ri namkai ¹⁶ ne fuuna kuus faasiroxo vulai xe sina Piran pami. E ne xali nami lana mu fenungan siak. ¹⁷ Ne fuuna lo fin a Piran sina Memai Yesus Krai sitaara, na Tamana aava pelalava, o i taa tavai nami pana Vovau Xaradak. E a Vovau Xaradak aave i taa tavai nami pana masaman e i taa kas a lamonan simi talo mi taa texaas faroxo sena. ¹⁸ E vaxa ne nunge o i taa kas a lamonan simi xena xalum a miridingan sina talo mi taa masam faroxo sena maana mo aava Piran fo siak fati nami pana. Aang, mi taa texaas sena lavayan ina maana tatavaian roxo aava Piran fo kuus fanai pana xe sina mu rabuna fatak.* ¹⁹ E mi taa texaas sena tateaxan ina gutan sina aava xavang netaara aava taara namkai. E a gutan aanabe¹ ve a gutan ²⁰ aava nane faisok lapaana layaan a fatatoi fa'uli na Krai ti la maatan e faneie la pamuaan sina, a vepen pelalava la xunavata. ²¹ Pave na Krai a paamuian a mu paamua, mu matalava, mu memai e mu piran pe la tavegof. A isina a pelalava sena mu isin lava xapiak naboxo e xe mui. ²² A Piran a tavai na Krai pana gutan xena paamuian a maana mo xapiak e a noxole xena paamuian a maana mo la faxuvulan sina rabuna sina. ²³ A mu rabuna aave ve ri vipin si Krai e ri faxurul na Krai malaan se Krai a faxurul a maana mo xapiak.

2

A Piran A Tavai Netaara Pana Toyan Fa'ui Se

* **1:18:** o: a mu rabuna sina Piran ve ri tatavai roxo xana Piran.

Krais

¹ Paamuina yaan mi namkai, mi fo maat lana vovau imi sena maana vilaana saat e mu faasaalan simi. ² Lana yaan aave mi fuuna usi a mu vilaana saat ti la xavala e a paamua ina mu vovau saat la tavegof. Nane ve a vovau aava taxa faisok naboxo lana toyan siri aava ri langai pesalai sina Piran. ³ Netaara xapiak vaxa taara waan la palou iri paamua. Taara fuuna masaga lana vubuxanan sitaara ti la xavala pana usiaana vubuxanan e lamonan aave. E malaan seri, taara tamu waan lapaana fakasanaman molava sina Piran. ⁴ Taasaxa Piran aava bas paaliu pana mamaaluxan, a vubuxan xasingit netaara ⁵ e vil fatatoi netaara xuvul pa Krais. E nane vil malaane layaan taara taxa maat lunai sena mu vilaana saat sitaara. Sena xakaavangan xatam sina, a Piran fo fakaxup netaara. ⁶ E senaso taara waan la xuvulaian xuvul pa Krais, a Piran fo fatatoi fa'uli netaara ti la maatan e fanei netaara xuvul pana la xunavata. ⁷ Nane vil a maana mo aanabe' xena faxalit a mu rabuna xe mui pana tang xakaavangan xatam sina e a xakaavangan xatam aanabe' a savat la matavas layaan a fangasik paaliuan netaara aava taara namkai se Krais Yesus. ⁸ Senaso mi namkai, a Piran a pisingan nami pana xakaavangan xatam sina xena fakaxupaan nami. A pife savat sena faisok simi, piau, piau paaliu! A fakaaxupan aanabe' ve a tatavai xatam sina Piran. ⁹ E senaso a Piran xa a tatavai pana fakaaxupan aanabe', pi ta mataa a fexaxaas sena ferawai falalava sena vilaana sina xa. ¹⁰ A Piran fo vesan fafa'ui netaara lana xuvulaian xuvul pa Krais Yesus talo

taara fexaxaas sena vil a maana buk faisok roxo aava lokavai mupiis nane faigotane xataara.

A Piran A Faxuvul A Mu Juda Xuvul Pari Aava Ri Pife Juda

¹¹ A mu Juda aava ri vuputuk, ri fuuna fasoxot nami aava mi pife Juda lana luluuxan simi, pana rabuna aava ri pife vuputuk. (Taasaxa ri taxa ferawai pana saxa vilaana aava mu tomexaan ri vile xe siri xa.) ¹² E voxo lamon fa'uli a yaan aava mi tigina patak se Kraiss. Mi pife rabuna ti Israel e nami ve mi mu topen aava ri pife waan lapaana mu turoxoian ina kuus fanaian e mi piau ta lamon fanaian xena waan bangaana pana faamamaasan. Aang, mi pife waan xuvul pana Piran lana yaan aave. ¹³ Taasaxa senaso mi namkai xo se Kraiss Yesu mi pife waan lasuun. Naboxo, mi waan faasilak sena maatan si Yesu xuluna bolo.

¹⁴ Nane xa a daarum xataara senaso a faxuvul a mu Juda xuvul pari aava ri pife Juda xena savat rabuna saxa mon. Nane, pana vipin sina, a kawaasan xapin a vaabat aava waan la palou itaara. A vaabat aave a malaan sena ri febaian nari. ¹⁵ Nane, lana vipin sina, a fexaxaasan a Vuputkai sina mu Juda pana mu fefasaian ina. Nane vil malaane xena fadaarum nami xuvul pamaam sena namkaian sitaara e voxo taara fo savat mataa fa'ui saxa. ¹⁶ E lana mataa fa'ui aanabe' i taa fadaarum nare xapiak xuvul pana Piran sena maatan sina xuluna bolo. E a maatan aave a fataxapin a febaian siri. ¹⁷ Nane maa kuusan famatavas a vilaana ina luaian xe simi aava mi waan lasuun sena Piran e xe simaam aava maam waan faasilak. ¹⁸ Sena faisok si Kraiss,

taara xapiak lapaana vovau saxa mon, taara fexaxaas sena falet fatak xe si Tamataara.

¹⁹ E voxo, nami, mi pife mu topen o rabuna ti lasuun fulaa, piau. Nami xapiak, mi waan xuvul pana mu rabuna sina Piran lana lifu sina. ²⁰ Nami ve mi mu xavil ina lifu aanabe'. A mu yaamut e mu rabuna ina kuus fatuxai ri fanei a fufuna lifu e a faat lava mata ina vesanaana ve na Krai's Yesu's. ²¹ Nane xo a timin faxuvul a maana xavil modak ina lifu xurul talo ri taa waan fatateak e nane xa a vil falavaie e fefasavat a tang lifu lotu taap xana Piran sang mon. ²² E senaso nami, mi namkai se Krai's, nane taxa faxuvul nami xapiak xuvul pana xasanofuna xena vesan a lifu aava Vovau ina Piran i taxa waan lana.

3

Na Pol Ve A Yaamut Xe Sina Mu Rabuna Aava Ri Pife Juda

¹ E sena maana mo aanabe' aava Piran fo vile, nenia, Pol, ne mataa vipis senaso ne sisiak si Krai's Yesu's xena xavangaan nami aava mi pife Juda.

² Tuuna, mi fo langai o a Piran fo tavaiau pana faisok ina kuusan fasavat a xakaavangan xatam sina xe simi ³⁻⁴ e a kas famatavas a lamonan siak e voxo ne masam sena maana mo nane vile se Krai's. Paamua ne fo kala xe simi pana mo aanabe' e tamo mi taa kate mi taa texaas o nenia, ne masam tuuna sena maana mo fufunai aave se Krai's. ⁵ Lumua a Piran pife faxalit a rabuna pana mo fufunai aave, taasaxa naboxo a Vovau sina fo faxalit a mu yaamut xaradak e mu rabuna ina kuus fatuxai sina, pana. ⁶ A mo fufunai aave a malaanabe': layaan ri namkai sena Lagasai Roxo,

a mu rabuna aava ri pife Juda ri fexaxaas sena waan lapaana roxoyan sina Piran xuvul pana mu Juda. Nari vaxa, ri rabuna sina Piran e ri taa siak a ngavuk ina maana mo aava Piran a kuus fanai pana xe siri aava ri namkai se Krai Yesus.

⁷ A Piran, lana roxoyan e gutan molava sina, a tatavai xe siak pana xakaavangan xatam sina talo ne taa sisiak sina Lagasai Roxo. ⁸ Naapalaan nenia, ne mataa palau mon sena mu rabuna fatak sina, nane tavaiau pana ngavuk lava aanabe': nenia, ne taa kuusan fasavat a Lagasai Roxo xe sina mu rabuna aava ri pife Juda. A lagasai aanabe' a kuus famatavas pana maana fafanaian e roxoyan molava piis aava waan xuvul pa Krai. Taara pife fexaxaas sena tingin a ngangai o katan ina. ⁹ E vaxa ne taa kuusan fasavat a maana mo fufunai sina Piran la matavas. Nane aava vesan a xavala e maana mo xuluna, a fun a maana mo fufunai aave ti lana tangpat ina yaan. ¹⁰ E naboxo nane vubuk rao a mu rabuna sina ri taa faxalit a maana buk texaasan lava sina Piran xe sina maana buk angelo aava ri paamuian a maana mo la xunavata pana gutan. ¹¹ A Piran a usi fatak a lamonan sina ti kavai paaliu e naboxo nane fasavate se Krai Yesus aava Memai sitaara. ¹² Lana xuvulaian xuvul pa Krai e sena namkaian sitaara sena, taara taa pife mataut e mangil sena laak xena ferawai xuvul pana Piran. ¹³ E voxo ne nung nami o mi taa pife kanamsaat sena maana lagafan aava ri savat siak, pami. A maana maasaxan aave ri taa xavang nami e mi taa lamon falava pana.

Na Pol A Fenung Pana Mu Efasis

¹⁴ Layaan ne lamon pana maana mo aanabe' ne bukaak la no Tamataara aava ¹⁵ tavai a mu matafetama xapiak sina la xunavata e la xavala pana isin tuuna siri. ¹⁶ E ne fine o ti lana maana fafanaian e roxoyan molava paaliu sina, i taa tavai nami pana gutan talo mi taa tateak lana xunus imi sena faisok sina Vovau sina. ¹⁷ E na Krai i taa lo taagul vulai la xunus imi senaso mi namkai sena. E ne fenung o a so ta mo mi vile, mi taa vile pana vubuxan xasingitan. ¹⁸ E nami, xuvul pana mu rabuna fatak sina Piran, mi taa toxan a tateaxan xena masam xapin a tang lavayan ina vubuxan xasingitan si Krai. ¹⁹ Ne fenung o mi taa texaas sena vubuxan xasingitan sina aava molava temasaat paaliu sena texaasan sitaara. E malaanabe' mi taa bas soliu pana vubuxan xasingitan sina Piran xa.

²⁰ Taara taa nangus a Piran aava fexaxaas sena sui fasoliu paaliuan a fenungan o nanomaian sitaara e nane fuuna vile sena gutan sina aava taxa faisok la xunus itaara. ²¹ Netaara e mu butaara xe mui aava taara mu rabuna sina Piran, taara taa kuus fati a isin molava piis sina sena xuvulaian sitaara xuvul pa Krai Yesus vulai xe vulai. A tuuna.

4

A Mu Rabuna Si Krai Ri Taa Faisok Faxuvul

¹ Nenia ve ne mataa vipis senaso ne namkai sena Memai e ne sisiak sina. E ne faxaar nami o mi taa sangas fatak lana toyan simi xuvul pa Krai malaan sena Piran a vubuxane layaan a xel nami xena namkai sena. ² Lamon fasivi nami

xa e bilai xe sina xasanofuna pana vilaana mam, waan fananap e faxalit a vubuxan xasingitan simi xe sina xasanofuna e yaas a lagafan aava ri tavai nami pana. ³ A Vovau sina Piran a fasavat a xuvulaian la palou imi e pis fatateaxe pana luaian. E nami, mi taa faisok pana gutan xapiak simi xena waan faroxo xuvul pana xasanofuna lana xuvulaian aave. ⁴ Nami xapiak mi toxan a Vovau saxa mon e voxo mi waan faxuvul lana vipin saxa mon. A Piran a xel nami xapiak xena waan xuvul lapaana lamon fanaian saxa mon. ⁵ Mi namkai sena Memai saxa mon e mi toxan a salan saxa mon ina namkai se Kraiss e mi fasufan lapaana isin saxa mon. ⁶ Mi toxan a Piran saxa mon aava Tamana mu rabuna xapiak: nane a pelalava seri; nane fuuna vil a maana faisok sina sena xakaavangan siri xapiak e nane waan lana xunus ina mu rabuna xapiak.

⁷ E voxo na Kraiss fo tavai netaara saxa saxa pana xakaavangan xatam talo taara fexaxaas sena vil a faisok sitaara. ⁸ E voxo lana Xakalayan Taap a kuus malaan:

“Layaan nane laak xe la bina pe laa'ui paaliu

nane falet paamuian a maana rabuna vipis e a tavai a mu rabuna pana maana tatavai.” *Yng 68:18*

⁹ (Lavaxa, a paferawaian “Nane laak” a toxan a so ta buk malasuf? A malaanabe!: paamuina laaxan sina nane sivimaan xe lapi la xavala. ¹⁰ Nane naang aava sivimaan xe lapi, a laak xe pe laa'ui paaliu sena mu xunavata talo i taa waan lana maana mo xapiak.) ¹¹ E nane xa a tavai a

saxanofuna pana faisok ina yaamut e saxanofuna pana faisok ina kuus fatuxai e saxanofuna fulaa pana faisok ina xelaana rabuna xena namkai e saxanofuna fulaa laa pana faisok ina fepitaa e faxatangaana rabuna sina Piran. ¹² Nane tavai nari pana faisok siri xena faigotanaana mu rabuna sina Piran talo ri fexaxaas sena xavang faagutan a vipin si Krai ¹³ fefexaxaas a yaan netaara xapiak, taara waan faxuvul lana namkaian e lana texaasan se Natuna Piran e taara tafe matoxol lana mu vilaana e lamonan sitaara malaan se Krai.

¹⁴ Lana yaan aave taara taa pife bilai fulaa malaan sena popo senaso a namkaian siri a falet feruuk malaan sena tof la laman e a usi a maana buk fepitaian sina rabuna aava ri bit o suaxan nari xena yuuf tapin nari sena salan roxo. ¹⁵ Taasaxa netaara, lapaana vilaana ina vubuxan xasingitan, taara taa ferawai tuuna e taara taa malaan sena sait lana vilaana sitaara. E voxo taara aava taara vipin, taara taa faisok xuvul pana paat, na Krai, malaan sena mataa saxa mon. ¹⁶ Nane tavai a vipin aave pana toyan e a fanei a mu xavil ina lana nobina siri e a mu yeis ti la vipin ri pis faxuvul a maana xavil aave. E layaan a mu xavil saxa saxa ri vil a faisok siri, lapaana vubuxan xasingitan, ri tafe palak e tateak.

Taara Taa Taagul Malaan Sena Rabuna Aava Ri Sangas La Malang

¹⁷ E voxo ne xuus nami, tuuna ne fasei nami lana isi Memai o mi muta taagul fulaa malaan sena rabuna aava ri pife Juda senaso a lamonan

siri a tavanat e ri fepalau. ¹⁸ A masaman siri fesotuk e ri piau ta toyan sina Piran senaso ri xawei a lamonan siri e ri bai texaas. ¹⁹ Ri pi mangil pana mu vilaana siri e ri laak lana vilaana saat xena fafaamamaas a tari xa. Ri fuuna lo vil vulan a maana mo aava fasavat a lalosaat.

²⁰ Taasaxa nami, mi pife texaas se Krai malaanabe'. ²¹ Tuuna, mi langai sena e nari aava ri fapiti nami pana maana tuunayan aava savat la matavas se Yesus, ²² ri fapiti nami o mi muta waan fulaa lana mu vilaana simi ti paamua senaso a toyan aave fo kawaasanan pana mu vubuxanan bit ina. ²³ Taasaxa, mi taa timin patak a maana mo ti paamua talo mi taa savat fa'ui lana fufuna lamonan simi ²⁴ e mi taa falak a mu vilaana fa'ui aava Piran a vesane pana vilaana fatak e xaradak malaan sena xa.

²⁵ E voxo, nami xapiak, mi taa ta'ulan a vilaana ina bitan e mi taa ferawai tuuna xe sina xasanofuna senaso netaara xapiak, taara mu xavil ina vipin saxa mon. ²⁶ "Lana maraleian simi muta vil a saat": Fataxapin a maraleian simi paamuina ngaas i rul ²⁷ e muta kas a toyan simi ulaa na Setan tamaa laak lana. ²⁸ Nane aava fuuna fenau i muta fenau fulaa. Taasaxa i taa faisok faagut pana ro mana xa talo i taa toxan a mo xena femiraaxane xuvul pari aava ri xaxaalif pana mo.

²⁹ Muta turoxoian a ferawaian aava i taa yuuf fasivi a rabuna xena savat la valami taasaxa ferawai faroxo mon xena xavang faagutan a rabuna aava ri langaie talo ri taa tigina fatateak.

³⁰ E muta famamaxus a Vovau Xaradak sina Piran senaso a Piran fo fakalimaan nami pana xe la

yaan i taa siak faxuvul fa'uli a mu rabuna sina.
³¹ Muta lamon fati a vilaana saat sina xasafuna sema, siak tapin a vilaana ina fetok vulai, sarak, maraleian, fasoxopes e kuusan pangan a mataa, e muta baian ta mataa. ³² Taasaxa bilai pana vilaana ina fangaasixan e maluluman; lamon tapin a vilaana saat la palou imi malaan sena Piran xa a lamon tapin a mu vilaana saat simi aava mi waan la xuvulaian xuvul pa Kraiss.

5

¹ E voxo, senaso nami ve mi mu rafuluk sina Piran mi taa pok a vilaana sina ² e mi taa bilai faroxo xena faxalit a vubuxan xasingitan simi, malaan se Kraiss a vubuxan xasingit netaara e lisan nane xa xe sina Piran pataara malaan sena falfaal e tatavai pana lasan roxo.

³ Taasaxa la palou imi ne bai langai a vilaana ina femilungai o buk vilaana lalosaat o naixaam senaso pife roxo a mu vilaana aanabe' ri taa savat la palou ina rabuna fatak sina Piran. ⁴ E vaxa a vilaana ina ferawai fasaat, ferawai palau o sarak, ri piau ta nobina la toyan simi taasaxa mi taa kuus faasiroxo xe sina Piran. ⁵ Mi texaas tuuna o a rabuna aava ri femilungai o ri lalosaat pana vilaana siri o ri naixaam- a mataa ina naixaam i taxa nangus a piran bit- e ri piau ta nobina o maana mo la fatataganan si Kraiss e sina Piran. ⁶ Muta turoxoian a rabuna xena bit nami pana ferawaian palau senaso Piran i taa fakasanam faagutan nari aava ri bilai malaan e ri langai pesalai. ⁷ E voxo, muta faxuvul xuvul pari lana vilaana saat siri.

⁸ Paamua a xunus imi a suk taasaxa naboxo nami, mi malang sena xuvulaian xuvul pa Memai. Taagul malaan sena rafulak ti la malang ⁹ (senaso a faisok siri aava ri waan la malang a fasavat a vilaana ina roxoyan, xaradaxan, e tuunayan) ¹⁰ e seng a so ta mo i taa fananam a Memai. ¹¹ Waan patak sena mu vilaana ti la suk aava piau ta malangiis roxo ina, taasaxa fasavat tuunei nari la matavas. ¹² Senaso i taa famangil a mataa xena ferawai pana maana mo a mu rabuna aava ri langai pesalai, ri vil fune. ¹³ Taasaxa maana mo aava waan la malang, a rabuna ri xalume ¹⁴ senaso a malang a famatavas a maana mo xapiak. E sena mo aanabe' ri kuus malaan:

“Para nano aava no taxa matef, tamasiak fa'ulaa ti la mamaat e na Kraisi i taa lang xulumi.”

¹⁵ Faxatang faroxoi a mu vilaana simi: muta faxatang malaan sena mataa vungut taasaxa faxatang malaan seri aava ri texaas faroxo, ¹⁶ e muta fataxapin palou a yaan pana mu vilaana palau senaso a mu yaan tanin ri bas paaliu pana vilaana saat. ¹⁷ E voxo, muta taagul malaan sena mataa vungut taasaxa masam sena so ta mo a Memai a vubuk rao mi taa vile. ¹⁸ Muta fatavanat a lamonan simi pana num temasaatan a raarum tateak senaso i taa kawaasan nami. Taasaxa mi taa bas pana Vovau ina Piran. ¹⁹ Mi taa ferawai xe sina xasanofuna pana yanganan ti lana Xakalayan Taap e mu yanganan aava mu rabuna ri xaleie xena kuus faatulan na Yesus; yangan xe si Memai pana yanganan ina faamamaasan la xunus imi ²⁰ e lana isi Memai Yesus Kraisi sitaara, kuus faasiroxo vulai xe sina Piran aava

na Tamataara, pana maana mo xapiak.

²¹ Mi taa waan lapaana xasanofuna senaso mi suai faagut se Krai.

A Vilaana Sina Rofelavaan

Kl 3:18-4:1

²² Nami lutefin, mi taa waan lapaana mu lavami malaan se' mi waan lapaana Memai.

²³ Senaso a tomexaan ve a putuna tefin sina malaan se Krai a putuna rabuna sina Piran e nane xa a Nges Ina Vil Fatato sina mu rabuna aave. ²⁴ E malaan sena mu rabuna sina Piran ri waan lapaa Krai, a lutefin ri taa waan lapaana mu lavari lana maana mo xapiak.

²⁵ Nami mu tomexaan, vubuxan xasingit a lutefin simi malaan se Krai a vubuxan xasingit a rabuna sina Piran e lisan nane xa pari ²⁶ xena siak patak nari: nane xamak tapin a lalosaat siri pana raarum e pana ferawaian ²⁷ xena lisanaan nari xe sina xa: a rabuna magaaf pana piau ta vusiit o fifius o ta xasano mo mosaat taasaxa pana xaradaxan e piau ta lalosaat. ²⁸ E malaanabe' a mu tomexaan ri taa vubuxan xasingit a lutefin siri malaan se' ri vubuxan xasingit a mu vipin siri xa. Nane aava vubuxan xasingit a naasana, a vubuxan xasingit nane xa. ²⁹ Lamon pana, pi ta saxa aava baian a vipin sina xa, piau, nane fafangane e faxatange, malaan se Krai a vile pana rabuna sina Piran ³⁰ senaso netaara ve taara mu xavil ina vipin sina. ³¹ "Sena fufuna aanabe' a mataa i taa ta'ulan na tamana e ninana e i taa waan la xuvulaian xuvul pa naasana e nare re taa savat vipin saxa mon."

Tpt 2:24

³² A mo aanabe' a mo fufunai molava taasaxa ne taxa ferawai pa Krai e a rabuna sina Piran.

³³ Lavaxa, nami saxa saxa mi taa vubuxan xasingit a mu naasami malaan se' mi vubuxan xasingit nami xa e nami lutefin mi taa suaian faagutan a mu lavami.

6

A Mu Rafulak Nari Na Mu Ninari E Tamari

¹ Nami mu rafulak lana xuvulaian xuvul pa Memai, langai a mu ninami e tamami senaso a vilaana aanabe' a moroxo. ² “Suai faagut se ninaam e tamaam ³ talo a waanan simi i taa falet faroxo e mi taa waan lou rus nabe' la xavala.” *Vpt 5:16*

A Vuputkai aanabe' a vuputkai mata pana kuus fanaian.

⁴ Nami mu tamana rafulak, muta famaralei palou a rafulak simi taasaxa xavang nari falak pana usiaana vilaana e fepitaian sina Memai.

A Mu Yaasok E Mu Paamua Siri

⁵ Nami mu yaasok, langai a mu paamua simi nabe' la xavala; suaian faagutan nari pana matautan e faisok pana gutan xapiak simi malaan se' mi langai na Krai. ⁶ Muta faisok mon xena fafaamamaas nari layaan ri taxa xalum nami, taasaxa malaan sena yaasok si Krai, a so ta faisok mi taxa vile, vil vulane pana gutan xapiak simi xena fafaamamaas a Piran. ⁷ Faisok faagut pana faamamaasan senaso mi taxa sisiak sina Memai e pife sina rabuna. ⁸ Mi texaas o a Memai i taa fasepirigus a mataa sena so ta mo roxo nane vile naapalaan nane a mataa yaasok o piau.

⁹ E vaxa nami mu paamua, mi taa bilai faroxo xe sina mu yaasok simi. Muta baras fasaat nari senaso mi texaas o nane aava Paamua simi xapiak, i taxa waan la xunavata e lana lamonan sina nami xapiak mi fexaxaas.

A Maana Mo Ina Fevisan Aava Piran A Tavai Netaara Pana

¹⁰ E naboxo a pebukaian fataxapiak: lana xuvulaian simi xuvul pana Memai, tigina fatateak pana gutan molava sina. ¹¹ Tao fatateak a maana mo ina fevisan aava Piran fo tavai nami pana talo mi fexaxaas sena ti votan a maana buk faisok si Setan. ¹² Taara pife fevis xasena mu rabuna aava ri toxan a vipin e ria, piau. Taasaxa, taara taxa fevis xasena mu masalai aava ri paamuian a mu bina, mu matalava sina mu vovau saat, mu rongan nabe' la bina suk la xavala e a mu angelo saat la tavegof. ¹³ E voxo tao fatateak a maana mo xapiak ina fevisan aava Piran fo tavai nami pana e layaan a yaan ina saatan i taa savat mi taa tigina fatateak. Mi taa pife faatasu famodak sena fevisan aave e layaan a fevisan a taxapus mi taa tigina fatateak lunai. ¹⁴ Tigina fatateak lana tuunayan aava pis faxuvul a maana mo ina fevisan malaan sena yowang e tivotan a famaremi pana vilaana fatak, ¹⁵ falak a Lagasai Roxo aava lisan a daarum malaan sena 'slipa' talo mi taa pife kalaxoi o poxo. ¹⁶ E fulaa mi taa tao fatateak a namkaian simi malaan sena baaf i taa puni a mu tol aava ri raam sina Saxa ina Saatan. ¹⁷ Siak a fakaaxupan sina Piran aava xafut a putumi e fun a Ferawaian sina Piran la xunus imi senaso a Ferawaian aave malaan

senā pinis modus aava Vovau a tavai nami pana. ¹⁸ Fenung pana maana buk fenungan e fiaian, lana tateaxan ina Vovau e pana xakaavangan sina la mu yaan xapiak; lalamon pana maana mo aanabe' e kaalum votai e lo fenung vulai pana mu rabuna fatak xapiak.

¹⁹ E vaxa fenung paga talo layaan ne buk ferawai, a Piran i taa tavaiau pana ferawaiian sina e ne taa pife mataut xena kuusan fasavat a tuunayan ina Lagasai Roxo. ²⁰ E sena Lagasai Roxo aanabe' nenia, ne saxa vipis. Fenung talo ne taa kuusan fasavate pana piau ta matautan senaso a vilaana roxo.

A Fasisian Fataxapiak

²¹ Na Tisikas aava ka tiak e sisiak roxo lapaana Memai, i taa xuus nami pana maana mo xapiak talo mi taa texaas sega e sena so ta mo ne taxa vile. ²² Ne taxa fenge xe simi talo mi taa texaas o maam taxa so e i taa fagut nami.

²³ Ne nung a Piran aava na Tamataara e a Memai Yesus Krai, o re taa tavai a mu fetinan pana luaian e vubuxan xasingitan xuvul pana namkaian. ²⁴ A xakaavangan xatam xe siri aava ri vubuxan xasingitan a Memai Yesus Krai sitaara pana vubuxan xasingitan aava i taa pife taxapus.

Kara New Testament
The New Testament in the Kara Language of Papua
New Guinea
Nupela Testamen long tokples Kara long Niugini

copyright © 1997 Wycliffe Bible Translators, Inc.

Language: Kara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-10

PDF generated using Haiola and XeLaTeX on 21 Feb 2024 from source files dated 31 Aug 2023

4e66a963-7eeb-5dca-b3f8-b1ef6c7ee59d